



Komunikadu Imprensa
18 Jullu 2022
Parlamentu Nasionál

JSMP konkorda ho hanoin distintu deputadu Asanami nian kona-ba sidadaun australianu ne'ebé halo manifestasaun iha Dili no husu Estadu atu tetu didi'ak molok fó solusaun

Iha reuniaun plenária, 12 Jullu 2022 nian, iha parte informasaun diversu, alende kestaun relevante sira seluk ne'ebé deputadu sira foti, deputadu sira mós foti kestaun kona-ba sidadaun australianu ida ne'ebé durante tempu naruk ona halo manifestasaun protestu kontra sistema justisa Timor-Leste nian no nafatin husu justisa ba nia kazu.

Preokupasaun ne'e mai husi distintu deputadu Mariano Asanami Sabino hodi hato'o ba iha plenária katak Estadu Timor-Leste liuhusi nia órgaun prinsipál sira hanesan Prezidénsia Repúblika, Parlamentu Nasionál no Governu tenke tau atensaun hodi buka ona solusaun ba ema ne'e nia problema.

Deputadu ne'e preokupa tanba manifestasaun ida ne'e hala'o kle'ur ona desde maun boot Xanana Gusmão sei asume kargu hanesan Prezidente Repúblika. Manifestasaun ne'e kontinua iha tempu prezidénsia Dr. Ramos Horta nian, Sr. Taur Matan Ruak nian, Dr. Lu'Olo no agora filafali ba Dr. Ramos Horta, maibé ema ne'e sei nafatin halo manifestasaun to'o nia katuas no isin mós krekas ona.

JSMP hanoin, Timor-Leste nu'udar nasaun ida ne'ebé nia istória luta ba demokrasia, lia loos no justisa sai hanesan referénsia iha mundu no istória ema nian. Nia ema no líder sira sai hanesan mestre no lutadór ba demokrasia no direitu umanu. Nune'e, JSMP absolutamente konkorda ho hanoin distintu deputadu Asanami nian katak Estadu Timor-Leste presiza buka dalan hodi rezolve lalais kestaun ida ne'e tanba se husik kle'ur liután to'o ema ne'e ses-an husi mundu ne'e, bele hafoer fali istória di'ak povu no rai Timor nia luta iha pasadu no imajen di'ak iha loron ohin no aban bainrua nian iha kestaun direitu umanu no justisa," dehan Diretora Ezekutiva JSMP, Dra. Ana Paula Marçal.

Diretora hatutan katak mezmune'e, iha parte seluk, JSMP mós rekomenda atu Estadu Timor-Leste presiza estuda didi'ak lala'ok kazu ne'e molok foti desizaun ruma hodi fó solusaun. Nune'e, bele evita situasaun hanesan mosu iha futuru ba kazu hanesan ne'ebé bele fó impaktu negativu ba sistema justisa Timor-Leste nian no loke dalan ba ema seluk atu uza mekanizmu hanesan ba sira-nia kazu hodi la fiar ba sistema justisa Timor-Leste nian.

Distintu deputadu Asanami kontinua iha nia intervensaun hato'o katak líder Timor-Leste nian sira hanesan Sr. Xanana Gusmão, Dr. Ramos Horta, Sr. Taur Matan Ruak, Dr. Lu'Olo no Dr. Aniceto Guterres nu'udar ativista no lutadór ba demokrasia, lia loos no justa ka direitu umanu iha pasadu tantu iha ai-laran no mós iha vila. Nune'e, deputadu ne'e husu atu sira bele tur hamutuk no bolu manifestante ne'e hodi bele buka solusaun atu rezolve nia problema ne'e.

Prezidente Parlamentu Nasionál, distintu deputadu Aniceto Longuinhos Guterres Lopes iha nia parte hateten katak rejista ona preokupasaun no rekomendasaun distintu deputadu Asanami nian ne'e hodi bele buka solusaun hamutuk.

Atu hetan infomasaun kompletu bele kontaktu :

Ana Paula Marçal

Diretora Ezekutiva JSMP

Email: ana@jsmp.tl

website: <https://jsmp.tl/>

Rua Beco Lakateu, Aldeia Manufuik,
Suku Colmera, Administrativu Vera Cruz

Dili Timor Leste

PoBox: 275

Telefone: 3323883 | 77040735

www.jsmp.tl

ana@jsmp.tl

Facebook: www.facebook.com/timorleste.jsmp

Twitter: @JSMPtl